

Allannguutissatut siunnersuut

uunga

Uunga siunnersuut: Katersugaasiveqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq

Aappassaaniigassanngorlugu Naalakkersuisunit saqqummiunneqartoq.

Qulequttap nassuiaataanut

1. Qulequttap nassuiaataa imatut oqaasertaqassaaq:

”(Kalaallit Nunaata avannaarsuani kangianilu Nunamit allanngutsaaliukkamit annissisinnaanermut malittarisassat sukannernerusut kiisalu Katersugaasiveqarneq pillugu ataatsimiititaliap katitigaanera, piffissaq atuuffissaa akilerneqartarneralu pillugit aalajangersakkat)”.

§ 1-imut

2. § 1, nr. 7-imi, § 33, imm. 4, imatut oqaasertaqassaaq:

” Imm. 4. Kalaallit Nunaata avannaarsuani kangianilu Nunami Allannngutsaaliukkami nassaat kalaallinit suliarineqarsimasut, nassaat pisoqaassusaat apeqqutaatinnagit Nunatta Katersugaasiviata Allagaateqarfialu akuersitinnagu nunamiit anninneqassanngillat.”

§ 2-mut

3. § 2, imm. 1, imatut oqaasertaqassaaq:

”Inatsisartut inatsisaat manna ullormi 1. juli 2019-imi atuutilissaaq.”

Siunnersuummut nassuiaatit

Oqaaseqaatit nalinginnaasut

Kalaallit Nunaata avannaarsuani kangianilu Nunap Allannngutsaaliukkap UNESCO-p Man and Biosphere Programmeanit ilaajunnaarsinnissaanik Naalakkersuisut aalajangersimanagerat tunngavigalugu allannguutissatut siunnersuut saqqummiunneqarpoq. Biosfæreqarfiup UNESCO-p Man and Biosphere Programmeanit ilaajunnaarsinneratigut sumiiffik siunissami nunatut allannngutsaaliukkatut taamaallaat taaneqartalissaaq taamaattumillu "Kalaallit Nunaata Avannaarsuani Kangianilu Nuna Allannngutsaaliugaq"-tut taaguuserneqartariaqarpoq. Tamatuma nassatarisaanik siunnersuummi qulequttap nassuiaataa siunnersuummilu § 1, nr. 7 allanngortinneqarnissaat pisariaqalerput.

Aammattaaq siunnersuutip aappassaaneerneqarnissaata pingajussaaneerneqarnissaatalu Inatsisartut 2018-imi ukiakkut ataatsimiinneranniit Inatsisartut 2019-imi upernaakkut ataatsimiinnissaannut kinguartinneqarnerata kingunerisaanik siunnersuummi § 2-p atuutilerfissaa allangortinneqassasoq siunnersuutigineqarsimavoq taamaammallu siunnersuut kingusinnerusukkut aatsaat akuerineqarsinnaassalluni. Siunnersuummi § 1, nr. 2-p aamma 3-p ullormi 1. januar 2020-mi atuutilernissaa pillugu § 2, imm. 2-mi aalajangersagaq allangortinnagu attatiinnarneqarpoq, tamatuma katersugaasiveqarnermut ataatsimiititaliamut ilaasortanik toqqaanermi aalajangersakkat taakkua atuutilersussaanerisa tunngavilersuutaasimaneri pissutigalugit. Maannakkut ataatsimiititaliap atuuffia ullormi 31. december 2019-imi atorunnaassaaq.

Siunnersuummi aalajangersakkanut ataasiakkaanut oqaaseqaatit

Nr. 1-imut

Qulequttamut nassuiaammi "Biosfæreqarfik" siunnersuutikkut peerneqarpoq. Tamanna pillugu nalinginnaasumik nassuiaatit innersuussutigineqarput.

Nr. 2-mut

§ 33, imm. 4-mi allassimasuni "Biosfæreqarfik" siunnersuutikkut peerneqarpoq. Tamanna pillugu nalinginnaasumik nassuiaatit innersuussutigineqarput.

Nr. 3-mut

Siunnersuutikkut Inatsisartut inatsisaata atuutilerfissaata 1. januar 2019-imiit 1. juli 2019-imut allangortinneqarpoq. Tamanna pillugu nalinginnaasumik nassuiaatit innersuussutigineqarput.